

Surat khabar: Utusan Borneo ( Horizon )

Hari/Tarikh: 9/9/2013

Muka surat: A1

Tajuk : Bengkel Pemantapan Sistem Mentor-Mentee.

## Bengkel Pemantapan Sistem Mentor-Mentee

**SERAMAI** 70 peserta terdiri daripada Timbalan Dekan Akademik dan Pemajuan Pelajar dan pensyarah dari setiap fakulti Universiti Malaysia Sarawak (UNIMAS) telah melibatkan diri pada Bengkel Pemantapan Sistem Mentor-Mentee anjuran Pusat Pemajuan Pelajar pada 29 Ogos yang lepas bermula jam 8 pagi sehingga jam 5 petang.

Bengkel tersebut merupakan program khas yang bertujuan untuk menyelaras dan memantapkan lagi pelaksanaan Sistem Mentor-Mentee agar ia mempunyai garis panduan yang jelas dan mudah untuk dibuat penyelarasan.

Selain itu, objektif bengkel ini adalah untuk mendedahkan kepada para peserta tentang peranan mentor sebagai fasilitator, pembimbing, pemerhati, jurulatih, penyelia, penunjuk cara, rakan penyiasat, kaunselor, penjaga, penilai, role model dan rakan kritik kepada mentee.

Seterusnya, bengkel ini juga menyingkap akan petua-petua mentor-mentee yang mencakupi antara lain ialah cara-cara untuk mewujudkan rapport dan kepercayaan

antara mentor-mentee, menjadikan jangkaan lebih eksplisit, menetapkan gol mahupun tujuan yang boleh dicapai, merancang strategi untuk mencapai setiap gol, mencatat secara bertulis apa yang telah dipersetujui serta sentiasa memelihara hubungan antara mentor-mentee secara professional.

Justeru, komponen-komponen penting pementoran yang dibincangkan dalam bengkel ini meliputi pengetahuan dan kefahaman mentor terhadap pementoran, kemahiran-kemahiran pementoran, sikap dan nilai terhadap pementoran serta isu dan permasalahan pementoran.

Berdasarkan pemerhatian, sistem ini diyakini dapat membantu pelajar dalam tiga aspek utama pengajian mereka terutamanya pengajian dan pembangunan akademik, pembinaan sahsiah dan personaliti serta perancangan prospek kerjaya.

Penutupan Bengkel disempurnakan oleh Timbalan Naib Canselor (Hal Ehwal Pelajar dan Alumni) UNIMAS Profesor Mohd Fadzil Abdul Rahman.